

## **Wárágà Pólò dré tisìle Kòlòsáyìbhá i dré dhi**

*Wárágà kònìdhi ni tà àndu ngìle drìdrì dhi*

Kònìdhi wárágà Pólò dré tisìle móndyá ka'ìbhá Kòlòsáyì na dhi i dré dhi 'i. Kòlòsáyì nda tá bhàandre àlo bvò Asíyà àdhya na, vwàlepi Èfésò rúsè ko dhi 'i. Sù ngóro Pólò ni tàndi tsa tá rè kònàle ko na tíni. Akódhi ni àzíamu, Epáfurà tsa tá Rúbí Tani longó gò, Èkèlézyà bhàzo kònàle dhi nì (1:7; 4:12). Amvolásà dhi, Pólò dré tá adrérà'a bǎdzó na dhi 'á dhi, yi tá tàle dhi, à adré tá Gìká ni tà tadhá Kòlòsáyìbhá i dré kinzò sè, adrézó tàà dhi, lè ì kàdré tirí àruka ópí kàdrì ro dhi kì lindrì bha, ì kàdré àyi kì 'o lwàle, ìndì ì kàdré tà àruka kì 'o kitswázó adrìlé, ìndì kitswázó Gìká ni ni dhi bvó.

Dì ásà dhi, Pólò adré wárágà kònìdhi ni tisì kitswázó tà nda kì lotó, ìndì kitswázó Rúbí Tani ni tà àndu ngì. Adré tàà dhi, lè à kàdré ngbà 'í Yésu Krísto ni ka'ì kòdhya, kitswázó adrìlé ìndì kitswázó Gìká ni ni dhi bvó. Gìká 'o tá akódhi nda ngá títi dhi kì bha gò, akódhi ni 'òzo kpà móndyá títi dhi kì amú tódhyá í be dhi kòdhya. Krísto nda ngá títi dhi i drìle, ìndì Èkèlézyà drìle (1:15-23). Dì ngóro mà dré akódhi ni ka'ìle adrélé àma kì Mírì ro dre dhi tíni dhi, lè mà kàdré atsìlé akódhi léna, adrélé tròle akódhi rú, adrézó àma kì tìmbà akódhi léna, mà kàtsáro rìnyi ró àma kì tà ka'ìka'ì na (2:6-7).

Kùdù ro dhi, Pólò adré móndyá ka ìbhá ì kàdré atsilé ngíni ya dhi ni tà tadhá. Adré tà tadhá àgo ki tà àyi ki tòkó íbe dhi dri, ànzimvá ki tà àyi ki tibhá íbe dhi dri, ìndì màràbà ki tà àyi ki mírì íbe dhi dri.

*Tà kàdrìkàdrì wárágà kònìdhi léna dhi ki atìma*

- 1) Pólò ni mòdo fèma, ìndì tà dré zìle Gìká tí Kòlòsáyìbhá ì dré dhi (1:1-14)
- 2) Krísto ngá tíí ì drìle, ìndì Ekèlézyà drìle (1:15-2:5)
- 3) Àma ki lídrì Krísto na dhi (2:6-4:6)
- 4) Mòdo kùdù (4:7-18)

*Pólò ni mòdo fèma*

<sup>1</sup> Ma, Pólò, bhàle adrélé Yésu Krísto ni àpóstolò ro ngóro Gìká dré lèle dhi tíni dhi, túmání àma ki adrúpi Tímòtéyò be dhi, mà adré wárágà kònìdhi ni tísi,

<sup>2</sup> àmi, àma ki adrúpi lólo adrèbhá Yésu Krísto ni ka'ì tà tíí ì sè Kòlòsáyì na dhi ì dré. Gìká àma ki Atá kòbhà áyi togó tani àmi rú, ìndì kòfè tà kìdrìkìdri àmi dré!

*Rúbì Tani tsa Kòlòsáyìbhá ì véna*

<sup>3</sup> Mà adré ngbú adrélé àwoyà fe Gìká, àma ki Mírì Yésu Krísto ni Atá dré àmi ki tà sè, adrézó kpà tà zi akódhi tí àmi dré.

<sup>4</sup> Tàko ko, mà yi tàle dhi, mì adré Yésu Krísto ni ka'ì, adrézó móndyá lólo Gìká àdhya ki le ngíni ya dhi 'í.

<sup>5</sup> Angyá ko, mì yi tá tà bàti Rúbí Tani àdhya tsàlepi àmi véna dhi gò, mì dré adrézó mǐ bha tà Gíká dré zùle àmi dré bhù na dhi ni tà sè.

<sup>6</sup> Rúbí Tani nda adré ayílé lò'wa dóro 'abe bvò wǎyi 'ásè, adrézó lǐle drǐdrǐ. Adré kókpà 'òá kònìni àmi kòfalé, kidhólé kǐtú mì dré tá Rúbí nda ni yǐzo gò, Gíká ni togó tani ni tà nǐzo bàti dhi sè, atsálé ándrò kònìdhi.

<sup>7</sup> Mǐ yi tá Rúbí nda àma kǐ àziàmú, Epàfúrà mà dré lèle tò dhi tí. Akódhi nda Krísto ni àzi 'òlepi àmi kǐ tà sè, kitswálé ka'ǐle togó wǎyi sè dhi 'i.

<sup>8</sup> Dì akódhi tà àma dré àmi kǐ lèle angálépi Tírí Lólo vélésè dhi ni tà nì.

### *Pólò zi tà Gíká tí Kòlòsáyìbhá i dré*

<sup>9</sup> Tà nda sè dhi, kidhólé kǐtú mà dré àmi kǐ tà yǐzo dhi sè dhi, mà adré tà zi Gíká tí àmi dré landè àko ró. Mà adré akódhi ni ti lizí, kò'oró àmi gàle tògyá wǎyi ìndì tà nǐni Tírí Lólo dré adrélé fèle dhi i sè bǐ, mì kòkitswáró tà Gíká dré adrélé lèle mì kò'o dhi kǐ ni dóro lavúlé be dhi bvó.

<sup>10</sup> Mà adré zǐá kònìni, mì kàdréro atsílé ngóro dré kitswálé Mírì mǐlésè dhi tǐni, adrélé tà akódhi ni togó dré adrézó kǐnǐlé ásà dhi kǐ 'o kòdhya. Mǐ kàdré 'òá kònìni dhi, mì ni adré lò'wa dóro 'a bǐ, adrézó kpà Gíká ni ni dóro adrézó lǐle ába drǐdrǐ.

<sup>11</sup> Mà adré kpà tà zi akódhi tí, kàdréro àmi kǐ tím̀bà áyi rǐnyí kàdrì mǐlanzìlanzì ro dhi sè, mì kàdréro togó tsi tà títì i sè, adrézó kpà tà letè togó vwàvwà sè.

<sup>12</sup> Mǐ kàdré kpà àwoyà fe Gíká Atá dré kólénzé sè be. Angyá ko, akódhi 'o àmi kitswálé títì, mì

kòkisúró tà dré lazílé áyi mónnyá lólo i dré tàylé ro dhi áyi Opì ngádra àdhya na be dhi bvó.

<sup>13</sup> Tàko ko, akódhi apá àma òpì tínímvá àdhya lésè gò, àma ki 'òzo afilé Opì áyi Mvá í dré lèlè tò dhi àdhya lé.

<sup>14</sup> Akódhi ni Mvá nda sè dhi, trì àma ki tàkonzì, àma ki apázó tàkonzì ni rìnyí lésè.

*Krístico dhya adrélépi ngá títi i drìle dhi 'i, ìndì Ekèlézyà ni drì 'i*

<sup>15</sup> Krístico nda, Gìká kitswálé nòle mǐ sè bwà ko dhi ni líndrì 'i. Akódhi Gìká ni Mváagó kàyo adrélépi ngá títi bhàle dhi i drìle dhi 'i.

<sup>16</sup> Tàko ko, Gìká 'o tá akódhi ngá títi dhi ki bha dhi kòdhya, gba kàdré ngá bhù na dhi 'i yà, ngá bvò dri dhi 'i yà, ngá kitswálé nòle mǐ sè dhi 'i yà, ngá kitswálé nòle mǐ sè ko dhi 'i yà, òpì 'i yà, rìnyí 'i yà, ópí kàdrì 'i yà, kó ngalè rìnyí adrézó òpì nya dhi 'i yà dhi. Bàti, Gìká bhà tá ngá títi nda i akódhi sè, ìndì akódhi dré.

<sup>17</sup> Akódhi tá kíno ngá títi dhi i kandrá. Adré kpà ngá títi dhi ki 'o adrélé ru totó àyi ki àrà i 'àsè dhi nì.

<sup>18</sup> Akódhi rúbhá ni drì 'i, kòdhi adré tàá dhi, Ekèlézyà ni drì 'i. Akódhi ngá títi dhi ki kidhoma 'i, ìndì Mvá kàyo ngàlepi drìdrì dràdrà 'àsè dhi 'i, kàdréro ngá títi dhi i drìle be dhi bvó.

<sup>19</sup> Tàko ko, Gìká nò tá dóro ni, í dré áyi tàndi ni lídrì 'òle gàle áyi Mvá nda léna bí gò,

<sup>20</sup> akódhi ni 'òzo ngá títi dhi ki amú tódhyá í be dhi, gba kàdré ngá bvò dri dhi 'i yà, kó ngalè ngá bhù na dhi 'i yà dhi. Dì Gìká bhà tà kàdrìkàdrì

àyi kòfalé ngá tíí nda íbe, áyi Mv́a nda ni kàrì kutulépi fa kípakipa dri dhi sè.

<sup>21</sup> Àmì ró dhi, àmì tá wáláká dhi vwàvwà ro Gĩká rúsè, adrélé akódhi ni kàrìbhá i ró, tà kònzi tíí mì dré tá adrélé kisùle adrézó kpà 'òá dhi ki tà sè.

<sup>22</sup> Dì, nyànomvá dhi, Gĩká amú àmì tódhyá í be Krísto ni rúbhá fèle dràle àmì ki tà sè dhi sè dre, í kò'oró àmì apfòle í kandrá mómí lólo i ró, tà kònzi àko ìndì tà àko àmì rú.

<sup>23</sup> Dì, adré leá dhi, mì kàdré tròle àmì ki tà ka'ika'í rú, adrézó àmì ki totó tātā Rúbí Tani mì dré ka'ile gò adrézó mì bha ásà dhi dri. Rúbí Tani nda, Rúbí adrélé longólé mómíyá tíí bvò dri dhi i dré dhi 'i. Gĩká bhà ma, Pólò, adrélé Rúbí nda ni àzì 'òlepi ró.

*Azì Gĩká dré bhàle Pólò drígá Èkèlézyà ni tà sè dhi*

<sup>24</sup> Nyànomvá dhi, má adré lenzélé kizà má dré adrélé nyàle àmì ki tà sè dhi i sè. Tàko ko, áma rúbhá na dhi, má adré kizà Krísto dré kídhóle nyàle dhi ki ka'í nyàle kíswálé tíí akódhi ni rúbhá ni tà sè, kòdhi adré tàá dhi, Èkèlézyà ni tà sè.

<sup>25</sup> Má atsá Èkèlézyà nda ni àzì 'òlepi ró, ngóro Gĩká dré àzì nda ni bhàle má drígá dhi tíni, má kòlongóro àmì dré Gĩká ni kulí kíswálé tíí be dhi bvó.

<sup>26</sup> Gĩká zù tá tà lùzu ró nda zùzù kíno lésè mómíyá lókyá tíí i sè dhi i dré. Dì, nyànomvá dhi, tadhá tà lùzu ró nda áyi mómíyá lólo i dré dre.

<sup>27</sup> Tàko ko, Giká nò dóro ni, í dré tà kàdrì lùzu ró ìndì m̀lanzìlanzì ro í dré lèle 'òle mónyá sùrú twá ro dhi i kòfalé nda ni 'òle àyi dré nìle dhi. Tà kàdrì nda, Krísto adrélèpi àmi léna, mì dré adrézó mì bha vélána kitswázó m̀lanzìlanzì kisú dhi 'i.

<sup>28</sup> Dì mà adré Krísto nda ni tà longó mónyá títi i dré. Mà adré àyi kì kodzó adrézó àyi kì tadhá tògyá wáyi sè, mà kòkitswáró àyi àlo àlo títi dhi kì 'o apfòle Giká kandrá, móndí lì'wábhá Krísto na kitswálé títi dhi i ró.

<sup>29</sup> Tà nda sè dhi, má adré àzì 'o, adrézó kpà àdzú bhu akódhi ni r̀nyí kàdrì adrélèpi tà 'o má léna dhi sè.

## 2

<sup>1</sup> Má adré làá mì kònì ngalè má adré àdzú bhu àmi kì tà sè, mónyá ka'ìbhá Làwòdikiyà na dhi kì tà sè, ìndì mónyá àruka títi áma nobhá r̀e ko dhi kì tà sè ngíni ya dhi.

<sup>2</sup> Má adré 'òá kònìni kitswázó àyi kì togó timbà, ì kàmúró ru atsálé ngá àlo ró lèle na be dhi bvó. Má adré kpà làá dhi, ì kòkisú tògyá gàle àyi léna bí, ì kòkitswáró Giká ni tà lùzu ró dhi ni ni dóro lavúlé, adrézó tà nda ni ka'ì kitswálé títi. Tà lùzu ró nda, Krísto ni tàndì 'i.

<sup>3</sup> Dhya ángùdhi ru amúlèpi akódhi nda be dhi adré tògyá làgí kyàkyà zùle akódhi léna dhi ni kisú, tà nìni be.

<sup>4</sup> Má adré tà kòdhi ni ta àmi dré, dhya àlo kòkitswáró àmi kì lití kulí kìnì i sè ko.

<sup>5</sup> Gba má dré adrézó àmi kòfalé yó dhi, áma togó ína ngbú àmi véna. Má adré lenzélé mì dré adrélé tà tíí dhi kí 'o mibhalé tí dhi sè, ìndì mì dré adrélé àmi kí totó tātā àmi kí tà ka'ika'í Krísto na dhi léna dhi sè.

*Ama kí lídrì Krísto na dhi*

<sup>6</sup> Dì ásà dhi, ngóró mì dré Yésu Krísto ní ka'ile adrélé àmi kí Mírì ro dre dhi tíni dhi, mì kàdré atsilé akódhi léna,

<sup>7</sup> adrélé tròle akódhi rú, adrézó àmi kí timbà akódhi léna, mì kàtsáró rìnyi ró àmi kí tà ka'ika'í na, ngóró tadhálé àmi dré dhi tíni. Mì kàdré kpà àwoyà fe Gíká dré tà tíí i sè.

<sup>8</sup> Mì kònò dóro, dhya àlo kòlìtíró àmi tògyá tàko adrélépi angalé móndí i drìlèsè dhi sè ko. Angyá ko, tògyá nda adré áyi totó labhi móndí kya i dri, ìndì tà bvò kòndi àdhya i dri. Adré áyi totó Krísto ní tà dri ko.

<sup>9</sup> Tàko ko, Krísto nda ní rúbhá na dhi, Gíká 'o tá áyi tándi ní lídrì gàle gagà.

<sup>10</sup> 'O kpà lídrì nda gàle àmi léna gagà Krísto na. Akódhi tírí tíí ópí kàdrì ro ìndì rìnyi ró dhi i drìle.

<sup>11</sup> Akódhi léna dhi, Gíká 'o kpà àmi lwàle dre. Dì, àmi kí lwàma nda, lwàma 'òle móndí kí drígá sè dhi 'i ko. Be ró dhi, Krísto 'o àmi lwàle, lovó kònzì rúbhá àdhya ní tìngázó dhi nì.

<sup>12</sup> Tàko ko, à sǐ tá àmi tùmání akódhi be bàtísimò na gò, àmi kí tìngázó tùmání akódhi be, mì dré Gíká ní rìnyí akódhi ní tìngázó dràdrà lésè dhi ní ka'ile dhi sè.

<sup>13</sup> Wáláká dhi, àmi tá móndí dràbhá dre dhi 'i àmi kí tàkonzì kí tà sè. A lwà tá kpà àmi,

lovó kònzi rúbhá àdhya ni tingázó dhi ko. Di, nyànomvá dhi, Gĩká 'o àmi adrélé túmání Krísto be dre. Tàko ko, trĩ àma kì tàkonzì ì tíí gò,

<sup>14</sup> tà tìsìle tátírítrí kúlí na adrébhá tá tà bha àma dri dhi kì pfùzo. Bàti, tingá tà nda ì àma rúsè, tidílé fa kípakipa dri.

<sup>15</sup> Lavú kpà tirí kònzi ópí kàdrì ro ìndì rĩnyi ró dhi ì, àyi kì rĩnyí tingázó àyi drígàsè, àyi kì tà yàyà tadházó mónnyá tíí dhi ì dré nòle.

<sup>16</sup> Di àsà dhi, mì kòtayí àmi dhya àlo dré tàbvó tàle, ngá mì dré adrélé nyàle dhi kì tà sè yà, kó ngalè ngá mì dré adrélé mvùle dhi kì tà sè yà dhi ko. Mì kòtayí kpà àmi tàbvó tàle gwányá adrézó Gĩká ni lindrì bha dhi ni tà sè yà, gwányá mbã sí àdhya ni tà sè yà, kó ngalè kítú sàbátù àdhya ni tà sè yà dhi ko.

<sup>17</sup> Tà nda kòdhi ì ngbà 'í tà adrébhá alìle dhi kì lindrì 'ì. Di, tà tàndì ìna Krísto 'ì.

<sup>18</sup> Mì kòtayí kpà mónnyá adrébhá àyi kì tà bha kìní mi túrúpfú sè ìndì adrébhá ángéló kì lindrì bha dhi ì adrélé tà bha àmi dri ko. Mónnyá làsú be kònìni nda ì adré ngá ì dré nòle toróbí tĩni dhi kì tà tíí, adrézó àyi kì afà àyi kì tà kisùle àngyá dhi ì sè.

<sup>19</sup> Di, ì lanzí ru Krísto, adrélépi rúbhá ni drì 'ì dhi be dre. Tákò akódhi nda adré rúbhá ni kígá tíí dhi kì 'o ru amú kídri tíí ìndì bã tíí adrébhá àyi kì tíí dhi ì sè gò, rúbhá nda dré adrézó mbàle ngóro Gĩká dré adrélé lèle dhi tĩni.

<sup>20</sup> Mì drà kó túmání Krísto be tà bvò kòndi àdhya ì lésè dre dhi, mì adré di àmikya tà 'o ngóro mónnyá bvò kòndi àdhya kya tĩni àdho tà



sè? Angyá ko, mì adré tòlí làsú be kònìni dhi ki lebè kòdhya:

<sup>21</sup> «Mí kòdo ngá kòndi mí dríá ko! Mí kòtabhì ngá kòndi ni tàdzí ko! Mí kòtabè ngá kòndi ko!»

<sup>22</sup> Ngá títi adrézó tà 'o ásà nda kòdhi ì adré ñwàle ñwanwà. Kòdhi íbe dhi, tòlí nda ì tà tadhálé nda íbe dhi ì adré ngbà 'í angálé mónnyá bvò kòndi àdhya ì drílèsè.

<sup>23</sup> Tà bàti ró dhi, tòlí làsú be kònìni nda ì sù ngóro tòlí tògya ró dhi ì tìni. Tàko ko, à adré tàá dhi, lè à kàdré tròle Gíká ni tà rú, à kàdré dhyá ki tà bha kǐní mi, ìndì à kàdré dhyá ki rúbhá 'o adrélé kizà nya. Di, tòlí nda ì kitswá àyikya àma ki ledé lovó kònzì àma ki rúbhá kya ki ató àma pálé dhi bwà ko.

### 3

<sup>1</sup> Di ásà dhi, Gíká dré àmi ki tingálé dràdrà lésè túmǎní Krísto be dhi sè dhi, mì kàdré àmi ki togó bha tà kurú na bhù na dhi ì dri. Kònàle dhi, Krísto adré lirílé Gíká ni dríágó lésè.

<sup>2</sup> Mì kàdré tà bvò kòndi àdhya ki kisù kòdhya ko. Be ró dhi, mì kàdré àmikya tà kurú na bhù na dhi ki kisù kòdhya.

<sup>3</sup> Tàko ko, mì drà dre, ìndì Gíká zù àmi ki lídrì tídhí ro dhi Krísto be í léna dre.

<sup>4</sup> Bàti, àmi ki lídrì nda Krísto 'i. Di lókyá akódhi nda dré dra apfòzo dhi tú dhi, mì ni kókpà apfò túmǎní akódhi be akódhi ni mìlanzilanzì na.

*Lídrì àku, ìndì lídrì tídhí*

<sup>5</sup> Di ásà dhi, lè mì kò'o àmi ki lídrì àku bvò kòndi àdhya ni tà i todràle. Tà nda i tà kòni 'i: ndòtò tà, tà ndĩ ró dhi, rúbhá lovó bhàma, lovó kònzì ki bhàma, ìndì ngá lovó bhàma. Tàko ko, ngá lovó bhàma, gĩká tàko ki lindrì bhàma 'i.

<sup>6</sup> Tà nda kòdhi i sè dhi, Gĩká ni kombà adrè alile mónnyá adrèbhá ligílè akódhi rú dhi i dri.

<sup>7</sup> Wáláká dhi, mì fè tá àmi adrélè tatsílé tà nda ki 'obe.

<sup>8</sup> Di, nyànomvá dhi, lè mì kòtingá àmi rúsè tà làsú be kònini dhi i títi: togóaswa, kombà, tà kònzì, móndí ki rú tàma kònzì dhi, ìndì kúlí swà adrèbhá apfòle àmi sílésè dhi i.

<sup>9</sup> Mì kòtà kpà kinzò àmi kòfalésè ko. Tàko ko, mì tingá àmi rúsè àmi ki lídrì àku túmání tà kònzì títi mì dré tá adrélè 'òle dhi íbe dre gò,

<sup>10</sup> mì dré lídrì tídhí ro dhi ni asózó àmi rú. Gĩká àmi ki bhàlepi dhi adrè àmi ki lídrì nda ni ladzá atsálè tídhí ro làsú be ína tíni, mì kòkítswaró akódhi ni ni dóro lavúlè be dhi bvó.

<sup>11</sup> Di ásà dhi, móndí i vélè twátwa ko, gba ì kàdrè Yúdà ànzi 'i yà, kó ngalè móndí Yúdà ànzi ró ko dhi 'i yà, móndí lwàle dhi 'i yà, kó ngalè móndí lwàle ko dhi 'i yà, móndí sùrú twá ro dhi 'i yà, móndí tà nibhá ko dhi 'i yà, màràbà 'i yà, kó ngalè móndí màràbà ro ko dhi 'i yà dhi. Tà kàdrì lavúlè dhi ngbà 'í Kristo adrélèpi àyi títi nda i léna, ìndì adrélèpi tà títi dhi 'i dhi 'i.

<sup>12</sup> Di àmi Gĩká dré lèlè tò ìndì dré zìle adrélè mónnyá lólo ína i ró ni i, mì kòtosó àmi tà dóro mì dré adrélè 'òle àmi ki togó dóro sè dhi i sè, àmi ki tà mì dré adrélè bhàle kìní mi dhi sè, àmi ki togó yàyà sè, ìndì àmi ki togó vwàvwà sè.

<sup>13</sup> Mì kàdré àmi ki adrúpi ki tà yàya mvo, adrézó àmi ki tàkonzì tri àmi kòfalésè, gba tàkonzì 'òle àmi rú nda kàdré àdho tà 'i ya dhi. Mì kàdré àmi ki adrúpi ki tàkonzì tri, ngóro Mírì dré àmi ki tàkonzì trìle dhi tìni.

<sup>14</sup> Tà kàdrì tà títì nda ki lavúlépi dhi, tà kònìdhi 'i: Mì kòtosó àmi lèle sè. Tàko ko, lèle nda adré àmi ki amú adréle ngá àlo ró kitswálé títì dhi nì.

<sup>15</sup> Mì kàdré Krísto ni tà kàdrìkàdrì tayí adréle òpì nya àmi ki togó na. Angyá ko, Gìká azí àmi adréle rúbhá àlo ró tà kàdrìkàdrì na. Mì kàdré kpà àwoyà fe Gìká dré.

<sup>16</sup> Mì kàdré Krísto ni kúlí tayí adréle gàle àmi léna bí, mì kàdréro tà tadhá ìndì ru kodzó àmi kòfalésè tògyá wáyi sè. Mì kàdré longó Gìká ni Kúlí na dhi ki ngo, tùmání longó adrézó Gìká ni rú bha kùle dhi íbe, ìndì longó adrébhá angálé Tírí Lólo vélésè dhi íbe, adrézó àwoyà ta Gìká dré.

<sup>17</sup> Kúlí títì mì dré adréle tàle ìndì tà títì mì dré adréle 'òle dhi i, mì kàdré 'òá Mírì Yésu ni rú sè, adrézó àwoyà fe Gìká Atá dré akódhi sè.

*Ago ki tà àyi ki tòkó íbe dhi, ìndì ànzimvá ki tà àyi ki tibhá íbe dhi*

<sup>18</sup> Àmi tòkó i, mì kàdré àmi ki drì asó àmi ki àgo i kandrà, ngóro dré kitswálé mónnyá adrébhá Mírì na dhi i sè dhi tìni.

<sup>19</sup> Àmi àgo i, mì kàdré àmi ki tòkó ki le. Mì kòbhà kpà togó kùdzí àyi rú ko.

<sup>20</sup> Àmi ànzimvá i, mì kàdré àmi ki tibhá ki kúlí ka'ì 'òle tà títì i sè. Tàko ko, Mírì ni togó adré kìnìlé tà nda sè.

<sup>21</sup> Àmi, ànzì kì atá ì, m̀ kàdré àmi kì ànzimvá kì togó 'o aswálé àngyá ko, àyi kì togó kòlanzìró ko.

*Màràbà kì tà àyi kì mírì íbe dhì*

<sup>22</sup> Àmi màràbà ro nì ì, m̀ kàdré àmi kì mírì bvò kòndì àdhya kì kúlí ka'ì 'òle tà tíí ì sè. Dì, m̀ kàdré ngbà 'í 'òá kònìni àyi nda ì mi, àmi kì tà kàdréro dóro àyi m̀lèsè dhì bvó ko. Be ró dhì, m̀ kàdré 'òá kònìni àmi kì togó wáyi sè, ìndì m̀ dré adrélé Mírì nì ro dhì sè.

<sup>23</sup> Tà tíí àngùdhi m̀ dré adrélé 'òle dhì ì, m̀ kàdré 'òá àmi kì togó wáyi sè, ngóro m̀ dré adrélé 'òá Mírì dré dhì tíni, móndí ì dré dhì tíni ko.

<sup>24</sup> Tàko ko, m̀ nì tàle dhì, m̀ nì làgí múrúngú Mírì dré lazilé àyi ànzì ì dré tàyilé ro dhì nì kisú dhì be. Mírì m̀ dré adrézó tà nì nì 'o màràbà nì tíni dhì, Mírì Yésu Krísto 'ì.

<sup>25</sup> Dì, dhya adrélépi tà kònzi 'o dhì nì tà kònzi kisú tà kònzi í dré 'òle dhì ì tí. Tàko ko, Gìká adré móndí kì no twátwa ko.

## 4

<sup>1</sup> Àmi mírì ro nì ì, m̀ kàdré àmi kì màràbà kì 'o dóro ìndì gyägya. M̀ kòtivì ko tàle dhì, àmi kókpà Mírì íbe bhù na dhì.

*Tà àruka tàle Kòlòsáyìbhá kì kodzózó dhì ì*

<sup>2</sup> M̀ kàdré àmi kì fe adrélé tà zi Gìká tí landè àko ró, adrézó tàmìga dri, adrélé kpà àwoyà fe akódhi dré.

<sup>3</sup> M̀ kàdré kpà tà zi Gìká tí àma dré, kònzìró láti àma dré kitswázó Krísto nì tà lùzu ró dhì

ni longó be dhi bvó. Tàko ko, tà nda tà má dré adrézó bã nya ásà dhi 'i.

<sup>4</sup> Di mì kàdré tà zi akódhi tí, má kòkitswáró tà nda ni longó ngádra 'á, ngóro dré kitswálé má dré 'òle dhi tíni.

<sup>5</sup> Mì kàdré tà 'o tògyá sè mónnyá Yésu ni ka'ibhá ko dhi i kòfalé. Mì kàdré lókyá wáyì mì dré adrézó ába dhi ki líkí, adrézó tà dóro 'o ásà.

<sup>6</sup> Mì kàdré ngbú kúlí ta àmì ki togó dóro sè, kúlí nda i kàdréró kìnìkìnì ngóro tà'í dàle manyàngá na dhi tíni, mì kònìró kpà adrélé tà logó móndí àlo àlo títi adrèbhá tà lízì àmì tí dhi i dré dhi be.

### *Mòdo kùdù*

<sup>7</sup> Ama ki adrúpi Tíkíkò mà dré lèle tò dhi ni áma rúbí títi dhi ki longó àmì dré. Akódhi nda àma ki àzìàmù 'i, ìndì Mírì ni àzì 'òlepi, kitswálé ka'ile togó wáyì sè dhi 'i.

<sup>8</sup> Di má adré akódhi ni dzo àmì véna, mì kònìró àma ki tà títi dhi i, ìndì kòtimbàró àmì àmì ki tà ka'ika'ì na.

<sup>9</sup> Ì adré lèle àmì véna, túmání àma ki adrúpi Onèsímò mà dré lèle tò dhi be. Akódhi nda angá àmì ki tàndi i kòfalésè, ìndì kitswá adrélé ka'ile togó wáyì sè. Ayì nda i kònì dra tsa dhi, i ni tà títi adrèbhá lavulé kònwa dhi ki títi àmì dré.

<sup>10</sup> Arìstàrúkò mà dré adrézó bãdzó 'á akódhi be dhi, fè mòdo àmì dré. Márokò, Bàrànába ni kòdromvá fè kpà mòdo àmì dré. Mì yi tá akódhi nda ni tà drìdrì dre. Kòtsa àmì véna dhi, mì kòka'ì akódhi dòle àmì véna togó dóro sè.

<sup>11</sup> Yésu, adrélé kpà rú zìle Yúsitò dhi, fè kpà mòdo àmì dré. Ayì nda kòdhi i Yúdà ànzì adrèbhá àma ki àzìàmù Gìká ni Opì ni tà sè dhi i

kòfalé dhi 'i àyi pátí. I adré kpà áma togó tindrì tò.

<sup>12</sup> Epàfúrà angálépi àmi kòfalésè, adrélépi kpà Yésu Krísto ni màràbà ro dhi, fè mòdo àmi dré. Akódhi nda adré ngbú tà zi Giká tí àmi dré togó be àtsi ró, mì kàdréro àmi kì totó tātā, adrélé li'wálé àmi kì tà ka'ika'i na, adrélé tà Giká dré adrélé lèle mì kò'o dhi kì ka'i 'òle títi.

<sup>13</sup> Má ni kitswá tàá akódhi nda ni tà sè dhi, adré áyi fe adrélé àzì 'o àmi kì tà sè, ìndì mónnyá ka'ibhá Làwòdikíyà na ìndì Yèràpòlì na dhi kì tà sè.

<sup>14</sup> Ama kì adrúpi Lúkà mà dré lèle tò, adrélépi kódzó ro dhi, ì fè mòdo àmi dré túmání Démà be.

<sup>15</sup> Mì kòfè mòdo àma kì adrúpi adrébhá Làwòdikíyà na dhi i dré, Nífà dré, ìndì mónnyá Èkèlézyà àdhyà adrébhá ru kimó akódhi ni dzó na dhi i dré.

<sup>16</sup> A kònà wárágà kònìdhi àmi kòfalé dre dhi, mì kòmù wárágà nda Èkèlézyà Làwòdikíyà na dhi dré kpà nàle be. Má adré kpà lèá dhi, mì kòdo wárágà má dré tá mùle àyi nda i dré dhi nàle àmi kòfalé be.

<sup>17</sup> Mì kòtà Arùkípò dré dhi: «Mí kònò dóro, mí kò'oró àzì Mírì dré bhàle mí drígá dhi akílé títi.»

<sup>18</sup> Ma, Pólò, má adré kúlí kòni kì tisì áma tàndì ni drígá sè, mòdo fèzo àmi dré. Mì kòtivì áma nyìrì kì tà ko. Giká ni togó tani kàdré àmi íbe!

**BÚKÙ TÀ TÍDHÍ//RU YÌZO DHÌ ADHYA**  
**Logoti (Logo): BÚKÙ TÀ TÍDHÍ//RU YÌZO DHÌ ADHYA**  
**New Testament**

copyright © 2015 Wycliffe Bible Translators, Inc.

Language: Logo

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 1 Oct 2024 from source files  
dated 29 Jan 2022

942af0a0-42ea-5477-8f1a-fed39823f32b